

東

華

錄

東華錄

臣周潤蕃恭校

秋七月丙申朔諭大學士等年羹堯從前題奏西藏青海等處軍功議敘文武官員多冒濫不實朕所深知今特施寬大之恩凡有軍功議敘文武官員若係年羹堯任內冒濫題奏者無論已升未升已授未授俱准速行據實自首其官職卑微不能自達者俱交該督撫提鎮齎送此皆出自年羹堯悖逆擅作威福之舉與伊等無干朕皆從寬宥釋若仍隱匿不首一經發覺定行嚴加治罪再此等無軍功者既可以效力議敘題補則實在立功人員亦必有挾私抑遏不行議敘者俱著將所以挾私之故詳細呈首○丁酉移河南開封府同知駐朱仙鎮陳州州判駐周家口○己亥諭大

學士等朕惟治天下之道首重用人朕自臨御以來凡大小文武官員俱親加看驗考試補用至降革罰俸等項處分必再三詳審務使情罪允當不令稍有屈抑今吏兵二部銓選處分則例刊刻遵行已久其中不無前後互異之處又見行則例有未經校刊者部內鈔白存查遇事引用外官無由得知姦胥猾吏因而上下其手亦未可定今律例館纂修律例將竣著吏兵二部會同將銓選處分則例並鈔白條例逐一細查詳議應刪者刪應留者留務期簡明確切可以永遠遵行仍逐卷繕寫並原書進呈朕親加酌量刊刻頒行再書肆有刻賣六部則例等書行文五城並各直省督撫嚴行禁止○辛丑移進賢縣巡檢二員駐甯州新建縣巡檢駐武甯專司稽察棚民裁玉山縣懷玉驛驛丞改設巡檢與玉山縣縣丞分轄隘口移瑞州府同知駐甯州銅鼓營南昌鎮標後營遊

擊駐銅鼓營銅鼓營原設之守備駐袁州府萬載縣後營遊擊所

轄千總駐瑞州府新昌縣袁州府屬之黎源廣信府屬之下鎮墟

地方各添外委把總一員帶兵防守○予故湖北巡撫納齊喀祭

葬諡勤恪○壬寅以宜兆熊署福建總督由福州將軍遷○癸卯諭大學

士等朕因隆科多年羹堯從前頗著勤勞賞給異數以示鼓勵今

二人交結專擅諸事欺隱所賞隆科多年羹堯之黃帶紫扯手雙

眼翎俱不許用四圍龍補服俱著交入○甲辰衍聖公孔傳鐸奏

請頒賜 聖諭廣訓朋黨論二書得旨我 聖祖仁皇帝教育羣

生 御製上諭十六條期以厚民風而端習俗朕仰承 先志推

衍發明著爲廣訓使愚氓易曉凡茲作述之間悉本 先師孔子

之道以爲是訓是行之本並無一語出乎聖教之外也卿爲至聖

後裔果能祇遵祖訓身體力行則修身齊家之道化民善俗之模

莫大乎是且植黨爲聖人所深戒向來孔氏子孫從無趨附匪黨  
之事所請二書不必頒發卿其恪遵好學力行知恥之訓能光家  
乘卽廣國華勉之慎之○丙午諭大學士等舊歲直隸總督李維  
鈞奏稱畿輔地方每有蝗蝻之害土人虔禱於劉猛將軍之廟則  
蝗不爲災朕念切惻痍凡事之有益於民生者皆欲推廣行之且  
禦災捍患之神載在祀典卽大田之詩亦云去其螟螣及其蠹賊  
無害我田稗田祖有神秉畀炎火是蝗蝻之害古人亦未嘗不藉  
神力驅除也今兩江總督查弼納奏稱江南地方有爲劉猛將軍  
立廟之處則無蝗蝻之害其未曾立廟之處則不能無蝗此乃查  
弼納偏狹之見疑朕專恃祝禱爲消弭災祲之方也其他督撫亦  
多有奏稱設法祈雨禱晴者夫天人之理感應不爽凡水旱蝗蝻  
之災或朝廷有失政則天示此以儆之或一方之大吏不能公正

宜猷或郡縣守令不能循良敷化又或一郡一邑之中風俗澆漓人心險僞以致陰陽沴戾災祲漸臻所謂人事失於下則天道變於上也故朕一聞各直省雨暘愆期必深自修省思改闕失朝夕乾惕冀回天意爾等封疆大吏暨司牧之官以及居民人等亦當恐懼修省交相儆誡夫人事既盡自然感召天和災祲可消豐稔可致此桑林之禱所以捷於影響也蓋惟以恐懼修省誠敬感格爲本至於祈禱鬼神不過借以達誠心耳若專恃祈禱以爲消弭災祲之方而置恐懼修省於不事是未免濬流而舍其源執末而遺其本矣朕實有見於天人感應之至理而斷不惑於鬼神巫禱之俗習故不惜反復明晰言之內外臣工黎庶其共體朕意○丁未諭大學士等年羹堯自任川陝總督以來擅作威福顛倒是非異己者屏斥趨附者薦拔又借用兵之名虛冒軍功以朝廷之名

器徇一己之私情目今事事收斂不可悉數其所用匪類如陝西  
官員內則有延安府知府李繼泰甯夏同知趙健河州知州許啓  
盛三原縣知縣劉子正南鄭縣知縣嚴世傑四川官員內則有川  
東道金德蔚永甯道周元勳保甯府知府王國正重慶府同知楊  
文斌建昌衛通判崔鳴圖邛州知州張純巴縣知縣周仁舉遊擊  
年悅此等官員平日侵蝕軍需剝削民膏諂媚上司苛刻地方實  
爲兩省之害著卽行文該省訓取伊等來京引見定奪又如年羹  
堯數年來參革及降調之文武官員甚多其中自有冤抑著吏兵  
二部一一查明繕摺具奏候朕親覽酌其情節降旨調來引見使  
年羹堯不得肆其蒙蔽而伊等不致受其誣陷且以爲罔上行私  
無知之大吏戒並爲鎮營黨附無恥之屬員懲再如川陝兩省副  
將以下千總以上等武官經年羹堯冒濫題補者俱著岳鍾琪詳

查擇其尤劣者參奏○都察院疏參吏部尙書隆科多議處年羹  
堯曲護徇庇不將伊公爵議革隆科多應革職得旨隆科多著削  
去太保職銜從寬免革職○戊申河南睢甯縣朱家口河溢○己  
酉諭禮部據奏八月二十三日 皇妣孝恭仁皇后服制期滿請  
照 皇考聖祖仁皇帝釋服之禮祫祭 太廟頒諭中外等語朕  
屢遭 皇考 皇妣大事追念罔極深恩莫由仰報三年以來祇  
於宮禁之中齋居素服默盡思慕哀戚之忱非敢自謂遵循古禮  
更不欲宣播於眾也父母之喪人子之心則一而帝后之禮國家  
之制則殊今八月二十三日屆 皇妣孝恭仁皇后釋服之期著  
擇日於 奉先殿告祭自行家禮至於頒諭中外可不必行○庚  
戌諭內閣凡官員離任每有地方士民保畱如果該員在任實有  
政績惠澤在人愛戴出於至誠理應赶上司呈請或清正廉幹之



官冤抑被劾百姓爲之抱屈者亦可赴闕申理乃邇來積習無論官員賢否概借保畱爲名竟不呈明上司輒鳴鑼聚眾擅行罷市顯然挾制其中買屬招搖種種弊端殊爲不法如果保畱盡係真情何以升任官員不聞有人愛戴者耶此乃刁風惡習斷不可長朕聞年羹堯自西安起身之時私屬咸甯縣知縣朱炯賄人保畱因年羹堯恃逆貪虐罪惡滿盈去時人人稱快竟無一人肯應者然後出城所過州縣或有迎送多人者或有一人不出舉手加額稱慶甚且唾啐者夫百姓若果愛戴自必通省皆然斷無此迎彼唾之理可見保畱官員者多非出於真情皆買屬逼迫而然也嗣後官員離任士民有擅行鳴鑼聚眾罷市者分別首從治罪其被保之員亦嚴加究治以儆刁風○辛亥都察院參奏據趙弘焯首告伊廷趙之垣侵吞家產趙之垣具呈陳辨並首告年羹堯將清

理伊叔趙弘變虧空銀四十萬兩侵欺入己李維鈞朋比爲姦請  
交部嚴審定擬得旨康熙六十一年冬朕卽位後趙之垣李維鈞  
同來陛見朕於倚廬召見二人諭趙之垣曰 皇考念爾祖舊日  
功勳加恩後裔爾父爾叔皆任以節鉞爾叔趙弘變在直隸時聲  
名甚屬平常且未完公項纍纍 皇考特予保全是以前爾叔身歿  
隨命爾署直隸巡撫印務以完爾叔未完之項乃爾莅任以來未  
能改易前轍朕仰體 皇考優待功臣後裔之意諄切訓誡爾當  
竭誠黽勉以益前愆又諭李維鈞曰爾係趙之垣屬官在直隸居  
官年久諸事諳練爾於趙之垣不可拘上司屬官之分當如骨肉  
相待諸事竭力規正使彼不至隕越以上成 皇考保全功臣之  
意並副朕仰體 皇考之心比時李維鈞回奏云臣惟有盡心竭  
力以幫助趙之垣等語次年二月年夔堯進京面奏趙之垣庸劣

執袴不可以膺巡撫重任朕諭之曰趙之垣爲人朕亦素知但伊之署理巡撫乃皇考保全功臣後裔之盛心去冬伊等來京朕已諄切訓誡之矣年羹堯見朕意不爲搖動一月之後復奏云趙之垣斷不可令爲巡撫伊從前居官不過庸劣今自皇上訓誡之後不惟不懷遵明旨反大肆貪婪以進上爲名向各屬私派銀三十萬兩並勒索從前未收之規禮朕聞之駭異亦不深信越七八日趙之垣果具摺進銀三十萬兩朕始以年羹堯之言爲實特將趙之垣解退今年羹堯帶往陝西以清趙弘燮虧項及至去年冬年羹堯又將趙之垣帶至京師再四懇求引見力保其可用年羹堯前後語言顛倒殊不可解今據趙弘燮首告又經都察院奏趙之垣控訴原委年羹堯欺罔姦詐設局誘陷情弊顯然著將此摺鈔發年羹堯李維鈞令其明白回奏○王子白潢以病免命高其

位爲文淵閣大學士兼禮部尙書

由松江提督遷

○以戶部尙書張廷玉

署大學士事○命隆科多往修阿蘭善山等城池開墾地畝○實

授岳鍾琪川陝總督圖理琛西安巡撫以馬喀爲陝西布政使

由內閣侍讀

○劉世奇緣事革職以程如絲爲四川按察使

由川東學士遷

道遷

○以萬際璋署廣東按察使

由鹽運使署

○癸丑以兵部尙書孫柱兼理

吏部尙書○內閣九卿詹事科道合詞劾奏年羹堯欺罔悖亂各

款請加誅戮以彰國法得旨年羹堯爲川陝總督貪婪放縱罔利

營私本應卽加處分因伊青海之功朕意尙欲委曲保全故罷其

總督之任授以杭州將軍令其效力以贖前愆乃今事事敗露不

料其欺罔悖逆之罪至於此極實爲國法之所不宥朕展轉思維

自古帝王之不能保全功臣者多有烏盡弓藏之譏然使委曲寬

宥則廢典常而虧國法將來何以示懲此所奏乃在廷之公論而

東華錄

雍正七

國家賞罰大事必諮詢內外大臣僉謀畫一可降旨詢問各省將軍督撫提鎮各秉公心各抒己見平情酌議應作何處分卽速具奏○乙卯命內閣學士何國宗等閱視河道諭曰運河關繫重大言者皆似近理而議論多有不同今蔣廷錫條奏款項爾等前往詳加閱看凡泉源湖身與各水源流地方形勢務須身到測看方得確準定議不可苟且草率意爲揣度以致後日勢不可行河道總督凡黃河所經皆其管轄豈能處處親到卽河屬官員偶有所見亦未敢輕易舉行爾等將儀器輿圖一併帶去再有算法館行走明白測量人員著何國宗指名舉奏二人帶去詳加測量或蔣廷錫條奏款項之外有關繫運道應查看修理之處亦逐一審視會同該督撫詳議具奏務期一勞永逸爾等於八月二十日起身乘驛前去儘遇無驛遞之處爾等輕騎減從該撫照料前往總河

齊蘇勒見在堵築黃河決口爾等此去先看漳河衛河後到濟甯則總河隄工事完便可會同閱看儻該督撫有緊要事務爾等或稍候數日或躬往就之勿致貽誤地方○諭刑部安民莫先於弭盜而爲政必貴於實心從前兩江總督查弼納條奏種種弭盜之法且欲水次釘椿以爲周防極似實心料理者乃今一月之內所報盜案竟有一百九件朕覽之不勝駭異豈因查弼納實心料理反致如是之多乎可見伊從前所奏盡屬虛偽欺飾耳查弼納身爲總督統轄文武弭盜一事尤其專責今前後盜案累累伊所司果何事耶茲特降諭旨與查弼納務必實心清致盜之源察高盜之所竭誠料理使盜賊斂迹百姓安堵以副朕意若因有此嚴旨更復隱諱蒙混使民害不得上聞凶惡肆行無忌必將查弼納治以重罪○吏部議覆署陝甘總督岳鍾琪疏參年羹堯建築邵陽

縣夏陽川城堡餘贖銀兩不歸司庫並不題請擅給各兵應將年  
羹堯一等公降爲二等公從之○丙辰解盧詢任以蔡珽爲兵部  
尙書兼理左都御史事由左都御史選○丁巳特命舉行經筵○以翰林  
院掌院學士阿克敦兼理左副都御史○庚申吏部議覆河南巡  
撫田文鏡疏參年羹堯鹽場徧置私人私鹽充斥又以印票運茶  
違廢茶引應將年羹堯二等公降爲三等公從之○辛酉禮部議  
覆朝鮮國王李吟疏奏宗祀之重未有所託請將副室所生之子  
李絳封爲世子查該王甫過三十遽請封副室所生之子與例不  
符應毋庸議得旨朝鮮請封世子事關伊國建立儲位該王必因  
萬不得已再三斟酌始懇切具奏著照所請行其請封所進禮物  
不必收受○封青海扎薩克台吉阿拉布坦爲輔國公○壬戌諭  
大學士等年羹堯以總督補放將軍亦爲升遷伊前違旨欲在儀

徵縣逗遛居住今又止將接任日期具奏並不謝恩有悖臣道著革退杭州將軍任授爲閒散章京在杭州效力行走其將軍印務著原任副都統王府長史鄂彌達前往署理○癸亥諭大學士等據廣西巡撫李紱參奏黃國材等向在廣西經收捐穀事例正項之外侵匿數倍應行查追黃國材著解福建巡撫任發往廣西質審○山西巡撫伊都立參奏貝子允禔護衛烏雅圖等在平定州地方擅行毆打生員應請按律治罪得旨此事從前諾岷隱匿未奏經朕聞知降旨詢問諾岷始行題參內有太監李大成乃允禔家下爲首緊要太監伊豈有不知此事之理諾岷訊審時以李大成患病不知此事竟爲脫卸遠行發回諾岷係滿都護屬下之人滿都護允禔比鄰而居伊等原屬同黨似此互相瞻徇強爲掩飾將置國典於何地耶諾岷大負朕恩伊都立到彼理應詳究乃止



據諾岷所審具奏疏忽殊甚此事仍著伊都立將太監李大成提  
往晉省明白對質將實情審出具奏至於允禩自來結納黨援不  
守本分且品行庸劣居心妄自尊大 聖祖皇考稍加訓誡輒云  
不過革去此微末貝子已耳偶遇勞瘁動稱若如大阿哥二阿哥  
一例拘禁我倒安逸此等狂悖之談時出諸口朕與諸阿哥所共  
知者及遭 皇考大事並未見有點滴悲淚朕御極後允禩昂然  
恣肆抗違諭旨狂悖之形種種不一朕因發往西甯居住稍示儆  
誠伊又寄書允禩語多悖亂且縱容屬下騷擾地方毆打民人罔  
顧國紀朕特遣都統楚宗前往約束及楚宗到彼宣旨伊並未迎  
接跪聽安居臥室豪無悔懼之容信口妄言有出家離世等狂悖  
之語且伊攜帶數萬金前往西甯濫行糜費買結人心地方人等  
俱稱九王爺伊不過一貝子耳尚未得貝勒職分又安得漫稱王

洵屬不識臣子大義悖亂之極允禔著革去貝子撤其佐領屬下  
並行文陝西督撫嗣後仍有擅稱允禔爲九王爺者從重治罪○  
乙丑調毛文銓爲福建巡撫由貴州調○召遲維臺來京以謝昃署湖

南按察使

由驛鹽糧儲道署

八月丙寅朔以福敏署浙江巡撫

由吏部右侍郎署

○庚午頒發孔子

及顏曾思孟閔子仲子廟

御書匾額○辛未諭大學士等年羹

堯從前竊弄權柄擅作威福所有脅從諂附者原不足深責今年

羹堯之姦邪僭逆種種敗露朕已洞悉屢頒諭旨頻敕內外諸臣  
令各洗滌已往儆戒將來共期改過若仍黨惡不悛則斷不姑恕  
諭旨甚明乃直隸總督李維鈞居心險譎竟敢陽順陰違如保定  
府城內見有年羹堯私置家產藏畱之財物彼並不參奏迨朕降  
旨令查尙具摺故作猶豫之狀希圖延挨俾得隱匿此等情景必

有緣由著馬爾賽蔡珽往保定府詳細詢察若果得姦欺黨惡實

情卽將李維鈞擊問請旨○以法海署兵部尙書

原任浙江巡撫

唐喀署

吏部右侍郎武格署刑部左侍郎

俱由副都統署

○召鄂爾泰來京以漆

紹文爲江蘇布政使

由山東監運使遷

○癸酉諭內閣九卿等古有諱名

之禮所以昭誠敬致尊崇也朕臨御以來恐臣民過於拘謹屢降

旨凡與御名聲音相同字樣不必回避近見各省地名以音同而

改易者頗多朕爲天下主四海臣民竭誠盡敬如此况孔子德

高千古道冠百王正彝倫端風化爲往聖繼絕學爲萬世開太平

自天子以至於庶人皆受師資之益而直省郡邑之名有聖諱

字在內者古今相沿未改朕心深爲不安爾等會議凡直省地名

有同聖諱者或改讀某音或另易他字至於常用之際於此字

作何回避一併詳議具奏○都察院遵旨察議吏部尙書隆科多

於議敘銀庫郎中等員一案並不從公商酌擅屬司官將熟練人員一時概議升轉必致接任辦事不能得人沽恩市惠甚屬溺職應革去世襲公爵得旨隆科多著從寬免革公爵止革去恩賜之一等阿達哈哈番○甲戌以李成龍爲湖廣總督魏廷珍爲安徽

巡撫增壽爲盛京工部侍郎

由署光祿寺少卿遷

○戶部議覆廣西巡撫李

紱疏柳州一府所轄二州十縣東西八百里南北九百里地廣事

繁其賓州上林等州縣徭獍頑劣察治尤難請以賓州改爲直隸

州管轄附近之上林來賓遷江武宣四縣其與柳州相近之七州

縣仍歸府轄再梧州府治設在東偏其西南至鬱林州已三百餘

里請以鬱林州亦改爲直隸州管轄北流博白陸川興業四縣其

與梧州相近之五縣仍歸府轄庶各得就近綜理應如所請從之

○乙亥吏部議覆鴻臚寺少卿單疇書疏參年羹堯樹黨營私任

用委署甯夏同知常璽等濫竊名器倚勢殃民實非尋常徇庇可比請將年羹堯所有三等公降爲一等精奇尼哈番從之○太子太傅武英殿大學士兼工部尙書王頊齡卒輟朝一日賜祭葬加祭二次謚文恭贈少傅○丙子諭內閣滿洲兵丁於技勇武藝俱已精練惟向來未習水師今欲於天津地方設立水師營分撥八旗滿洲前往駐防操演似屬有益其應於何處駐紮設立幾營派兵若干用船若干並如何製造船隻如何演習兵丁之處著怡親王會同朱軾張廷玉蔣廷錫拉錫詳議具奏○丁丑西洋教化王伯納地哆遣使鳴噠都易德豐進表貢獻方物宴賚如例○戊寅以張謙爲貴州巡撫由大理寺少卿遷○己卯諭吏部都察院安民必先弭盜盜風不息皆由有司官諱盜不報之故不但江南地方盜賊素多近聞河南湖廣路上有過往官員被劫者州縣官賄賂事主

通同隱匿司道既無覺察督撫亦受蒙蔽以致盜賊無忌貽害不小不可不嚴行稽察朕思巡按御史久經裁汰自不可復今或於滿漢御史並部員內揀選賢能官酌量於湖廣江南浙江福建山東河南等省每省或差二員或一員或兩省差一員兼理令其專司稽察盜賊並巡查驛站煙墩儻有縱容盜賊隱諱不報者許據實題參一切地方事務差員不得干預若生事滋擾必從重治罪爾等詳細酌議具奏○辛巳諸王大臣等請隨時駐蹕圓明園允之○以米價騰貴命發倉減價平糶○癸未吏部議覆吏部左侍郎查郎阿奏直隸州州判雖係佐貳見管逃盜等案不便以捐納貢監補授管轄屬縣請將舉人銓補州同恩拔副榜貢生銓補州判應如所請從之○甲申諸王大臣等合詞疏奏本月二十一日

皇上告祭 奉先殿三年之大禮既盡萬載之嘉祥方始臣等

謹按唐六典云皇帝卽吉之期百官奉表具賀宴於紫宸殿宋嘉祐禮云仁宗宮中改吉百官奉觴上壽臣等法古禮典擬備筵宴進獻闕廷以展踴躍懼忭之忱祈 皇上俯允所請得旨朕荷

天 祖默佑克盡三年之禮然孺慕之念終身莫釋於懷昨已曉諭廷臣矣茲諸王大臣援引古禮陳奏懇切勉從所請以慰臣民

虔望之意○乙酉李維鈞緣事革職以蔡珽署直隸總督

由兵部尚書署

○丙戌 孝恭仁皇后三年服滿 上詣 奉先殿祭告行釋服

禮 上御乾清宮召諸王大臣入見垂淚諭曰父母之恩鞠育顧

復爲人子者終身仰報不盡而朕荷 皇考 皇妣教育之恩尤

爲至深至厚誠所謂欲報之德昊天罔極也三年之中如祭祀朝

會國家大禮不可曠缺朕不得已勉從諸王大臣之請照例舉行

不過於宮中持服以默盡其心而究未能盡此心於萬一也日月

易邁已屆三載禮制有定而朕心無窮此一領素服朕衣之三年今日更換不勝悽愴之至朕之一念豈但三年固結於中卽終身之久亦斷不能忘也○丁亥諭刑部嗣後直隸各省秋審情實緩決可矜人犯各該督撫仍照常具題外該部進呈黃冊時著將情實緩決可矜三項分別彙歸各項仍照省分遠近爲序從雲南省起刊刻刷印進呈○八旗都統等將服色等事各按等秩定制具奏 上召入諭曰覽奏欲將官員軍民服用一概加以禁約朕試問諸臣照此定制以申禁約能管束令其必改乎斷不能也法令者必其能禁而後禁之明知法不能勝而禁止之則法必不行從前屢禁而不能豈可復禁乎且照此奏各按等秩將段匹及貂鼠捨獠獠等細裘悉行禁止不准服用轉令大臣官員得以賤價購而服之是乃富室獲其利也其兵丁等概令更換則布匹等物一



時價值騰貴反致貧乏兵丁難以爲生有何益哉爾等見有服用  
僭越之人誠飭約束曉諭而訓導之以爲伊等生計漸至醒悟數  
年之後自然悛改一遵儉樸矣不必過於煩細以致紛擾○戊子  
召羅密來京以德明署直隸布政使由戶部  
郎中署○己丑吏部議覆刑

部左侍郎黃炳疏參原任川陝總督年羹堯係封疆大吏於南坪

築城一案委用知州邊鴻烈等恣行擾累激變番民又不據實參

奏明係年羹堯啟釁生事隱匿徇庇應將所有一等精奇尼哈番

降爲一等阿思哈尼哈番從之○庚寅 上御經筵○以李紱爲

直隸總督鄂爾泰爲廣西巡撫由江蘇布  
政使遷○辛卯吏部議覆西安

巡撫石文焯疏原任川陝總督年羹堯參革四川夔州守程如絲

私賣鹽斤貪殘凶暴一案俱屬虛事明係年羹堯捏詞妄參應將

所有一等阿思哈尼哈番降爲一等阿達哈哈番從之○壬辰

上幸圓明園駐蹕○諭宗人府怡親王果郡王寶心爲國凡朕所  
交之事盡心竭力辦理操守亦甚清廉隨朕行走之處甚多所費  
甚繁著加怡親王俸銀一萬兩果郡王著照親王給與俸銀俸米  
護衛亦照親王府員額著順承郡王班居果郡王下○諭吏部兵  
部朕在圓明園與在宮中無異凡應辦之事照常辦理爾等應奏  
者不可遲誤若無應奏事件在衙門辦事不必到此其理事之日  
爾等於春末秋初可趁早涼而來秋末春初天時寒冷於日出之  
前起行不但爾等不受寒暑卽隨從人夫亦不至勞苦矣

九月乙未朔戶部議覆陝西巡撫圖理琛疏陝省西安延安兩府  
管理州縣地廣事繁請將商州同州華州乾州邠州耀州鄜州葭  
州綏德州俱改爲直隸州其西安府屬之鎮安雒南山陽商南四  
縣分隸商州朝邑郃陽澄城韓城四縣分隸同州華陰蒲城二縣

分隸華州武功永壽二縣分隸乾州三水淳化長武三縣分隸邠

州同官白水二縣分隸耀州延安府屬之雒川中部宜君三縣分

隸鄜州吳堡神木府谷三縣分隸葭州米脂清澗二縣分隸綏德

州應如所請從之○丙申允岳鍾琪來京陛見以圖理琛署川陝

總督由陝西巡撫署○丁酉諭大學士等前因天津倉廩潮溼不能收貯

米石故停止截畱今據蔡珽奏稱天津倉廩雖不能貯米可分發

各州縣以備賑濟請仍截畱二十萬石等語著戶部速派賢能滿

漢司官各一員前往天津會同倉場總督托時將河南小米截畱

二十萬石一面行文蔡珽令其酌量應貯米之州縣撥派官員於

天津地方領運收貯備賑前李維鈞奏請賑濟一月朕思賑濟原

不可拘定期著加賑三箇月務令小民得所見今遣增壽等前

往奉天採買米石運至天津即可行文伊等於米石之外採買高

梁或十萬石或七八萬石一併運至天津於賑濟大有裨益爾等  
卽遵諭行○諭戶部朕體恤臣工時深軫念每思經理區畫以贍  
其俯仰之資查舊例在京大小漢官每年俸米俱支給十二石蓋  
因向日漢官攜帶家口者少食指無多故給米十二石卽可粗足  
今見漢官帶家口者多若俸米仍照舊數則日用或有不敷難免  
內顧之慮嗣後在京大小漢官著按俸銀數目給與俸米俾祿糈  
所領足供養贍以示朕加惠羣臣之至意○戊戌張道緣事革職  
以鍾保爲甘肅按察使由刑部  
郎中選○壬寅順天府府尹張令瓚疏藉  
田嘉禾一莖九穗實屬盛世奇瑞闔府紳士耆庶公額撰文立碑  
昭示奕禩得旨藉田嘉穀雖有九穗之瑞但今歲畿輔地方被水  
小民乏食朕方修省之不暇所請撰文勒石不必行○甲辰大學  
士高其位以衰老不勝機務具疏懇辭溫旨諭畱之○加川陝總

督岳鍾琪兵部尙書銜○召陳世倌來京陛見以布蘭泰著山東

巡撫

由布政使署

○乙巳吏部等衙門議覆川陝總督岳鍾琪條奏各

省土司承襲例取宗圖冊結鄰封甘結由該管地方文武官以次

申呈督撫具題乃地方官往往藉此居奇將其印信封固勒索陋

規不爲請襲甚有數年不能用印管事者遂致部族番目專權生

事互相爭奪釀成讐殺最爲隱害請定立嚴限以除地方官畱難

勒指之弊應如所請凡土官病故該督撫於題報之時卽查明應

襲之人取具宗圖冊結鄰封甘結併原領號紙定限六箇月內具

題承襲其未經具題之先卽令應襲之人照署事官例用印管事

地方官不得將印信封固致滋事端再查土司之許襲承襲者原

因其祖父向化歸誠著有勞績之故今伊嫡長子孫雖得承襲本

職此外支庶更無他途可以進身亦屬可憫嗣後各處土司文武

官員嫡長子孫仍令其照例承襲本職其支庶子弟中有馴謹能辦事者俱許本土官詳報督撫具題請旨酌量給與職銜令其分管地方事務其所授職銜視本土司各降二等一體頒給敕印號紙其所分管地方視本土官多則三分之一少則五分之一庶幾本末各有條理使勢足相維則情更相安矣從之○己酉諭內閣從前年羹堯查拏陝西郃陽縣私鹽用兵一案初據年羹堯奏稱並未傷損一人及朕畱心訪察知有傷損居民之事續據黃焜寄與范時捷稟帖亦止稱傷損數十人朕再加訪問知所傷之人甚多因傳諭審事侍郎史貽直高其佩令其用心查訪勿以黃焜從前用威恐嚇小民不敢申訴實情今據史貽直高其佩奏稱遵旨查訪實在因年羹堯用兵致死無辜男婦老幼共七百八十六名口連前報出之十九名共傷損八百零五名口俱取有該縣冊結

鑿鑿可據又奏稱年羹堯因查拏鹽梟曹猪頭而該縣將良善之馮猪頭頂名解送年羹堯並不覆審卽將馮猪頭正法等語朕以愛養百姓爲心惟恐一夫不獲其所乃年羹堯負朕委任之恩逞其兇暴之性草菅民命毒害無辜以致多人受其慘酷皆由朕任用匪人之故深自愧憾實無以謝郟陽之紳衿黎庶郟陽地方旣被騷擾著該督撫等加意撫綏其被害之家雖經欽差官員賞給銀兩著該督撫等再行優恤雍正四年郟陽縣應徵錢糧盡予豁免該督撫等可徧行曉諭合邑紳衿黎庶伊等遭年羹堯之殘害幸朕畱心察訪研究實情使伊等沈寃得伸今特沛恩膏以示軫恤務令僻壤荒村咸知朕意○諭宗人府普照之子恆冉見在承襲公爵其家原不應有二公向因普照在軍前效力尙屬勤謹且年羹堯之妻係普照兄女朕因年羹堯青海之功又念普照原係

承襲公爵之人是以特授爲輔國公今年夔堯如此背負朕恩其  
普照之公爵著不必承襲○庚戌裁會考府衙門其從前任事大  
臣隆科多朱軾白潢盧詢等議敘有差○甲寅命吏部尙書朱軾  
爲文華殿大學士仍管吏部尙書事調兵部尙書蔡瑋爲吏部尙  
書仍管兵部尙書左都御史事○丙辰諭大學士等凡事皆要持  
平一有所偏則輕重顛倒爲累非淺况用刑豈可或偏乎爾等稱  
朕寬大詳審朕看來詳審尤爲緊要蓋能詳審而得其平則所施  
一當於理並無寬大之足名矣此卽用中之道也且偶然錯誤人  
所時有語云人非聖賢孰能無過人能自見其過庶可馴至無過  
如自謂無過則過必更多矣卽如爾等歸美朕躬朕不敢自謂已  
能也全賴爾等匡弼設使朕有過失爾等果能直陳無隱朕且欣  
然納受雖詞色之間必無幾微相拒之處爾等不可不知也○予



先賢顯孫師後裔世襲五經博士○吏部議覆川陝總督岳鍾琪疏參原任川陝總督年羹堯將甘州巴爾庫爾等處官員應行奏請錢糧之事誑稱此非交代事件並不交代明白應將年羹堯所有一等阿達哈哈番降爲拜他拉布勒哈番得旨年羹堯所有職銜俱著革去○丁巳諭大學士等朕體恤臣工凡官員辦事著有勞績者無論大小俱敕部議敘其有過誤致干吏議者亦照例處分夫一人之身有功有過一官之級有降有加舊例官員降級畱任停其升轉必三年無過方准開復降級後雖有恩詔加級不准抵銷殊非以功補過開人自新之義嗣後降級畱任官員遇有恩詔及議敘加級者俱准以加一級抵銷降一級庶使人皆奮勵勉圖後效亦鼓舞吏治之一道也至於降級後捐納加級者不得抵銷前案○諭古者視歲之上中爲儲蓄之節蓋爲民經畫久遠不

爲一時苟且之計積之於豐年用之於歉歲所謂有備無患法良而意美也朕自臨御以來宵旰勤求無刻不以民依爲念乃重農積粟之詔屢下而閭閻卒少蓋藏官倉亦多虧缺卽如直隸保定等府去歲頗稱有秋今春二麥亦熟乃以夏秋雨水過多田禾被澇而民間遂有饑色若非多方賑恤窮民必致失所此皆草野無知食不以時用不以禮但快目前之有餘罔計異日之不足一朝旱澇追悔無從至於常平義倉原爲備荒而設乃有司奉行不力多至缺額罪何可追茲據江南浙江江西湖廣福建河南山西陝西廣東廣西雲南貴州等省督撫報稱今歲秋成八九十分不等朕覽奏不勝慰悅又重爲吾民計及長久宜乘此時講儲蓄之道以備將來該督撫等可轉飭有司徧行曉諭務須撙節愛惜各畱餘地預爲他時緩急之需社會之法亦宜趁此豐年努力行之勿

但視爲虛文故事朕爲吾民籌畫養贍之道惓惓於懷無時或釋而吾民自謀其身家若但苟且因循不復長顧遠慮則重負朕軫念元元之意矣至於州縣倉儲向有虧缺者若不趁此豐收之時速行買補將來發覺斷不姑貸慎之○己未裁陝西郃陽縣新設參將守備各一千總二把總四兵八百名○庚申諭內閣朕前曾降諭旨凡來圓明園奏事之大臣官員等不必太早今見大臣等務皆早到如在南城居住人員必得五鼓前來其年老有疾之人必受寒冷爾等效力惟在實心辦事似此奔走並無關繫若侍衛及職司看守人等則不得不然蓋以伊等之專職也爾等若不盡心於職分雖經年如此奔走何益之有嗣後爾等咸知朕旨毋得有違雖稍遲誤或一二人不到亦無妨礙並不至有誤事之處也○刑部等衙門議覆吏部左侍郎史貽直刑部右侍郎高其佩奏

臣等審理年羹堯誣劄茶商私占鹽窩二案緣商人王欽菴第自  
義等十一人自湖廣買茶屯貯陝西平陸等處咸甯知縣嚴士俊  
私稟年羹堯遣人隔省提拏誣以私販勒派贖罪銀一萬四千兩  
復將曲沃縣富戶高科等十人姓名陷入案內勒派幫助銀七萬  
六千八百兩嚴士俊及曲沃知縣魏士瑛等共得銀九千二百四  
十兩又年羹堯管理鹽務時革退舊商將伊子年富年斌偽編商  
人富斌等名色私占山西潞安澤州等鹽窩十七處自出本銀行  
鹽別令心腹人等偽編商名私占陝西咸甯等十八處鹽窩代己  
行鹽前後得利銀十七萬二千二百兩又聽信嚴士俊之言私行  
印票一萬二千張每票抵作十引共增鹽引十二萬張止以十萬  
具奏其二萬張課銀盡入私橐請將年羹堯革職拏問年富年斌  
革職嚴士俊魏士瑛等俱擬絞監候秋後處決年羹堯等所得銀

兩照例行追分別入官給主其行鹽本利銀兩應於年羹堯名下嚴追一併入官查年羹堯所有職銜已於別案俱行革去應俟各省將軍督撫提鎮議奏到齊之日提拏到京審擬正法一等精奇尼哈番年斌應革職年富已於別案拏問應從重歸結餘並應如所請從之○辛酉琉球國中山王尙敬遣使貢方物○甲子 欽定律例告成○升直隸河間府所屬天津州爲直隸州管轄武清青縣靜海三縣

冬十月戊辰諭內閣外省官員督參撫審撫參督審此係向來定例但朕思督撫果係同城駐紮或相距不遠則舊例甚屬合理若隔處遼闊該犯與干連人等不無往返拖累且案件亦易至耽延卽如山東河南山西俱無總督但有巡撫凡題參事件應如何得就近審理使案件易於歸結情罪皆得公平著九卿議奏等議嗣

後總督所參之員仍照例令各該撫審理其福建湖北陝西雲南等省巡撫與總督同城江甯安徽廣東等省督撫雖不同城兩江總督駐紮江甯府爲江甯安徽適中之地兩廣總督駐紮肇慶府與廣東巡撫駐紮之所相去不遠亦皆應照舊例撫參督審外其湖南雖屬湖廣相隔洞庭一湖甘肅雖屬陝西相去千有餘里以及浙江江西四川廣西貴州等省均屬隔省巡撫所參之員應卽令該撫就近審結該布按兩司審轉時卽備詳總督稽覈仍令巡撫將審案移會總督合詞具題從之○調高其倬爲閩浙總督以伊都立爲雲貴總督布蘭泰爲山西巡撫張保爲山東布政使由南按察使遷○以李衛爲浙江巡撫調常德壽爲雲南布政使由江西調○以積善爲江西按察使由刑部郎中遷○己巳刑部議覆川陝總督岳鍾琪疏參年羹堯幕賓趙士河將故弟趙勳軍前效力知縣職銜令

劉以堂頂替年羹堯掩護欺罔不行實奏應將年羹堯鎖拏來京按律正法得旨此案顯係年羹堯通同作弊明知故爲之事朕令其明白回奏並不其實陳首復立意欺罔佯爲不知巧飾奏聞朕已遣人將年羹堯提拏來京俟其來日嚴究質審○庚午 上御太和殿補行慶賀冊立 皇后禮○調綽爾岱爲刑部左侍郎馬進泰爲工部右侍郎以武格爲盛京刑部侍郎由副都統遷○辛未句決山西省情實人犯 上諭大學士等用刑貴於平恕惟平惟恕斯寬非濫而嚴非枉但平恕二字必詳慎精密得其至情方能無誤若止照舊例斷決則一巡撫衙門老吏能之何待朕與爾等大臣悉心商酌爾等須竭力贊襄有言必盡毋畏母隱○壬申諭刑部鬪殺人本應抵償其奏准存留養親追給埋葬銀兩此法外之仁也旣免其抵償則埋葬銀兩自應照數追給以恤死者之家若

止存給付之名而無領受之實是不但於情理未協而於法律亦未爲允當嗣後一應追給埋葬銀兩之案務必交與該地方官實在照數追給然後將該犯釋放報部存案若不行照數給付者必將該犯仍行監追儻並未追給而捏稱付給卽將該犯釋放者告發之日將該管地方官一併從重議處○癸酉 玉牒成○諭西洋教化王伯納地哆日覽王奏並進貢方物具見惻誠我 聖祖仁皇帝怙冒萬方無遠弗届 龍馭升遐中外臣民悲思永慕朕繼承大統勉思紹述 前徽教化王地處極遠特遣使臣齎章陳奏感 先帝之垂恩祝朕躬之衍慶周詳懇至詞意虔恭披閱之餘朕心嘉慰使臣遠來朕已加禮優待至於西洋寓居中國之人朕以萬物一體爲懷時時教以謹飭安靜果能慎守法度行止無愆朕自推愛撫卹茲因使臣歸國特頒斯敕並賜糕段錦段大段



六十四次段四十四王其領受悉朕惓惓之意○甲戌浙閩總督  
覺羅滿保卒遺疏聞得旨滿保向來居官雖無廉介之稱然才幹  
優長盡心辦事整飭營伍經理海疆實爲稱職昔年臺灣一事雖  
不得消弭於未然而能於七日之內卽行克復功過足以相抵朕  
卽位以來時加教誨滿保亦知奮勵矢志廉潔及至抱病沈篤之  
際尙能畱心地方將黃國材畱閩以待新任巡撫並將總督印務  
交與將軍宜兆熊此等料理之處俱屬得體今聞溘逝朕心深爲  
軫惻應得卹典著察例具奏大凡督撫離任封疆重務必須接受  
分明如廣東巡撫楊文乾聞計卽便起程將巡撫印務交與總督  
孔毓珣孔毓珣交與李杅李杅復送還孔毓珣彼此互相推諉殊  
非體統嗣後督撫丁憂者不得遽行送印其任內文卷擇司道一  
人代行聽候諭旨方行離任庶不至貽誤公事○乙亥工部議覆

河道總督齊蘇勒奏治河物料全資葦柳請酌定附近管河文武員弁栽種葦柳議敘其效力各官及民人等亦分別議敘至河兵補栽額柳向無議處之條今亦請釐定專汛各官處分自雍正四年爲始著爲定例應如所請從之○丙子封簡親王雅爾江阿子永謙爲鎮國公恆親王允祺子弘陞順承郡王錫保子熙夏俱爲輔國公○己卯朱絳因病解任以常賚爲廣東布政使由戶部郎中遷○丁亥黃焜緣事革職以費金吾爲河南布政使許容署陝西按察使由權驛道遷○彭振翼緣事革職以鍾保爲甘肅布政使李元英爲甘肅按察使由陝西平慶道遷○庚寅以王朝恩爲內閣學士調布爾察爲湖南巡撫改伊都立爲山西總督管巡撫事以楊名時爲雲貴總督仍管巡撫事鄂爾泰爲雲南巡撫兼管雲貴總督事以汪灃爲廣西巡撫由內閣學士遷○辛卯署川陝總督圖理琛疏參四川巡撫

王景灝前在西甯地方經手辦理軍需於年羹堯冒銷軍需銀兩之處朦朧具奏請將王景灝解任質審得旨王景灝從前依附年羹堯相助爲惡凡年羹堯種種貪暴劣蹟王景灝事事阿附朕知之甚悉以年羹堯之勢力王景灝不能抗拒固屬不職然當此之際亦有出於不得已之處朕念王景灝年力方壯才亦可用姑從寬免其解任予以自新年羹堯任內凡係王景灝經手之項著逐一據實開明造冊移送陝西督撫以憑確覈毋得絲毫蒙混隱漏伊若能痛懲前非洗心改過朕自照舊任用儻仍復贍徇私黨不實心爲國出力必嚴加治罪○實授謝昃湖南按察使○壬辰添設稽察盛京御史一員清查五部及將軍衙門事件每一年派換○癸巳命提鎮廕生願改武職者候考試簡用○是月免廣東海康遂溪二縣雍正二年水災額賦有差

十一月乙未朔諭大學士等今年直隸州縣被水小民乏食朕軫念殷切除截留漕米發給常平倉穀外又將通倉米六成以上者著托時陳守創親交余甸蔡起俊運赴天津分散賑糶今朕訪得所發之米朽爛不堪其高者不過三四成低者全屬灰土朕軫恤災黎宵旰憂勞無時或釋乃托時等全不仰體朕心將此無用之米運給有名無實小民何所資藉此次已運成色米十萬石著賞給各處窮民再另發六成以上米十萬石令托時陳守創余甸蔡起俊運往天津再今歲秋季所發官俸兵糧米色俱不好嗣後若再如此必從重治罪康熙五十五年曾發通倉米五萬石分貯各州縣備用歷年已久聞俱陳腐甚爲有司之累著從寬豁免○浦文焯緣事革職以張廷棟爲直隸按察使由監督御史遷○議政王大臣等議覆川陝總督岳鍾琪奏打箭鑛界外之裏塘巴塘乍了又木

多雲南之中甸又木多之外羅隆宗察哇坐爾剛柔鳴吹宗袞卓爾部落雖非達賴喇嘛所管地方但羅隆宗離打箭鎗甚遠若歸併內地難以遙制應將原係內地土司所屬之中甸裏塘巴塘再沿近之得爾格時瓦舒霍爾地方俱歸內地擇其頭目給與土司官銜令其管轄其羅隆宗等部落請賞給達賴喇嘛管理特遣大臣前往西藏將賞給各部落之處曉諭達賴喇嘛知悉再康濟甯阿爾布巴既封爲貝子管理西藏事務請令康濟甯總理阿爾布巴協理頒給敕諭曉諭唐古特人等盡令遵奉二人約束庶免擾亂之患至從前年羹堯奏請噶達地方設立總兵官駐紮今若將羅隆宗等處賞給達賴喇嘛則噶達地方設立總兵官之處請行停止俱應如所請得旨畫定內地疆界給與達賴喇嘛地方曉諭番人之事著遣副都統宗室鄂齊學士班第扎薩克大喇嘛格勒

克綽爾濟前往會同提督周瑛詳細辦理○丙申諭諸王大臣等  
內府佐領內管領等從前康熙三十年閒所用錢糧不過三十餘  
萬兩今增至七十餘萬兩朕思以國家徵輸之額賦而養此並非  
正項兵丁無用人口且逐年增添無所底止甚非經久之策是以  
屢詢廷臣商酌變通之法據廉親王奏稱旗下披甲人每一佐領  
止二十四名內府佐領亦應照此辦理朕云內府佐領下人等甚  
多若照八旗裁減恐不可行廉親王奏稱臣屬之圖巴海佐領俱  
係六七人始得一披甲錢糧照此辦理無不可行朕因將此事交  
與莊親王及常明來保同廉親王確議乃廉親王議將內府佐領  
下增甲九十餘副廉親王在朕前奏請裁減內府佐領之甲及至  
議奏反議增添誠不知其何心若果前奏難行亦當陳明從前所  
奏之誤何以面奏可裁而又議加增陰邪叵測莫此爲甚伊從前

種種姦謀欺騙諸臣在廷共識其姦伊計無所施又借此搖惑此等卑下之人欲以擾亂政事且邀結人心沽取名譽而加朕以不美之名朕念內府佐領披甲之人多係殷富官員之家人卽如來保常明家人披甲者甚多且內管領人等卽幼穉亦有錢糧其披甲錢糧乃分外多得之項將此裁去未嘗不可因酌量定額每佐領准其畱甲五十副裁其家下披甲內之多者且目前亦不卽行裁減俟其缺出扣除不補乃來保常明自顧其私將不甚緊急事件連夜通傳守夜步軍不能禁止以致內府佐領無賴之人齊集廉親王府門妄行嚷鬧彼時廉親王來奏此事適本日朕將廉親王之舅家撥給廉親王朕意謂其必因撥給之事來奏未曾召入諭令於諸王大臣奏事之日同奏而廉親王並未聲明內府佐領人等嚷鬧情由卽行退去次日莊親王內務府大臣奏稱內府佐

領下人等至廉親王處嚷鬧朕降旨云親王之邸何得擅入嚷鬧且母妃在內豈可驚擾爾等速行逐散如不散卽行鎖拏若不能鎖拏卽將莊親王革去王爵來保常明正法伊等遵旨前去乃是日並未至廉親王處嚷鬧朕往旃檀寺瞻禮問及提督阿齊圖奏稱三十日至廉親王處嚷鬧次日至李延禧家嚷鬧且搶去物件派出官兵拏獲數人等語朕始聞知而內務府大臣並未向朕奏明後莊親王與常明來保等拏獲數人審訊奏稱據供嚷鬧李延禧家係廉親王所使廉親王亦直認不辯朕意若果係廉親王所使廉親王必不肯認今旣承認必非廉親王所使朕素深知廉親王奸詐因令阿齊圖研審各犯果供並非廉親王所使及再問廉親王乃云此等無知小人我原替他應承來廉親王陰致人於死地而又於此等處代爲應承冀人感激其居心之卑鄙尙可問耶



况內府佐領下人數百名前往嚷鬧此等不法之事伊視爲淡然不行入告置之而去豈非欲加朕以不美之名耶此案搶奪李延禧之家固屬不法至於親王府邸擅入嚷鬧尤爲大干法紀此俱係莊親王來保常明等始則孟浪通傳致起事端繼又不行據實奏聞所致莊親王著罰親王俸三年常明來保俱著革去內務府總管來保著柳號三箇月鞭一百廉親王審定爲首嚷鬧之五人著廉親王查明具奏交與夸岱額騰吉同刑部侍郎二人監看正法其餘爲從四十餘人著交與刑部定擬斬絞監候秋後處決至王邸自有守門官員兵丁此等之人何由得入著將伊等交與今日面奉諭旨之王大臣會同察議具奏近日廉親王乘醉將伊門下之護軍酷打致斃隱匿不行奏聞恐死者之家申訴遣太監等屬令寢息今日朕當諸臣之前面問廉親王初猶枝梧反覆窮詰

始俯首無詞廉親王外市慈厚之虛名而內忍行慘酷斃人之實  
專准工於矯飾而欲蓋彌彰著交領侍衛內大臣與宗人府會審  
具奏○丁酉諭內閣來保原在辛者庫朕卽位後拔入佐領下授  
爲內務府總管理應凡事加謹效力乃並無一事輸誠陳奏一味  
苟且因循沽名釣譽甚屬不堪今姑從寬典免其枷責伊兄見在  
跟隨誠親王著同伊兄一處行走效力毋得推諉遲延○甘國奎  
緣事革職調董永艾爲浙江按察使以徐湛恩爲山東按察使仍  
管兗甯道事○戊戌諭內大臣等朕曾降旨著廉親王永禩察奏  
爲首嚷鬧之五人卽行正法今據廉親王允禩將爲首五人姓名  
具奏此內有自首一人又有一人堅供抱病未去而廉親王允禩  
據廚子認識遂入於五人之內可見廉親王所審甚不足憑人命  
關繫重大豈可草率定案廉親王允禩生出事端擾亂政事若此

等曩闖妄爲之人不行處治則國法何在若卽據廉親王允禩所  
審正法則其中不無冤抑此事原不必急迫可將案內眾犯交與  
刑部監禁著內大臣大學士議政大臣九卿等公同詳確會議○  
己亥宗人府遵旨議奏允禩心懷姦惡其悖逆結黨之罪屢蒙

皇上寬免超授親王畀以重任理應感恩悔過乃從前旣欲裁減  
包衣披甲額數及交伊辦理忽背前議奏請增添激令內務府人  
等嚷鬧明係市恩惑眾毫無畏懼姦惡已極相應革退和碩親王  
撤出屬下佐領以示懲儆得旨允禩革退和碩親王並撤出屬下  
佐領之處俱從寬免○壬寅 上以 聖祖仁皇帝三週又恭值

孝莊文皇后安奉地宮之期恭詣 山陵是日啓鑿○甲辰予  
故太子太傅湖廣總督楊宗仁祭葬加祭一次諡清端贈少保給  
拜他喇布勒哈番世職○丙午 上謁 昭西陵 孝陵 孝東

陵 景陵○丁未 上謁 景陵旋詣 昭西陵行安奉 地官

告祭禮回鑾○戊申 上還京師○己酉諭禮部貴妃年氏秉性

柔嘉持躬淑慎朕在藩邸時事朕克盡敬慎在皇后前小心恭謹

馭下寬厚和平 皇考嘉其端莊貴重封爲親王側妃朕卽位後

貴妃於 皇考 皇妣大事悉皆盡心力疾盡禮實能贊襄內政

妃素病弱三年以來朕辦理機務宵旰不遑未及畱心商榷診治

凡方藥之事悉付醫家以致耽延日久目今漸次沉重朕心深爲

軫念貴妃著封爲皇貴妃備事一切禮儀俱照皇貴妃行○乙

卯九卿遵旨議覆設立各省巡察官並該員出差事宜及地方官

盜案處分十一條一出差官職司巡察應令禮部鑄給關防以重

職掌一各州縣盜案於巡察官處一體通報以憑稽察一巡察官

令其所歷地方密訪盜賊窩藏之處會同地方文武官弁協力捕

緝以清盜源一衝途驛站有差使肆行騷擾者詳報巡察官據實題參一道路煙墩應令巡察官加意查察倘有防守疏懈者題參議處一巡察官務於一年內徧歷通省各府悉行訪察一年之內克稱厥職從優議敘倘遇有盜案通同隱匿或在地方生事滋擾者該監督查參議處一承緝盜案初限不獲降一級無級可降之官革職俱畱任仍照舊例遵行外至再限不獲例應調用革職者今議再畱任一年如一年內能獲盜過半照例開復如再不獲始照例調用革職其承緝官將一案盜犯全獲者每案紀錄二次一請寬承緝盜首之處分嗣後限內獲盜過半並獲盜首者免其參處限內獲夥盜過半而盜首未獲者罰俸一年再限不獲盜首者罰俸二年三限不獲盜首者降一級畱任一凡事主報盜如有地方官借端嚇阻者嚴實題參照諱盜例革職其有失察書役需索

及拖案事主者一併題參從重議處若事主有以竊報強挾制官  
府妄行控告者查明治罪一地方官遇有盜案一面申報上司卽  
一面關會鄰境州縣營汛等官徧處查察一月內拏獲鄰境案內  
盜首者加一級再紀錄一次拏獲夥盜者每一名紀錄一次拏獲  
之兵役令原失事之地方官給銀二十兩一月後拏獲者紀錄三  
次拏獲過半者紀錄二次一捕盜廳官於所屬州縣官如有諱盜  
不報及以強爲竊察出揭報者免議失察者罰俸一年徇隱不報  
者革職如所轄地方緝拏盜犯三月內全獲一夥者准其紀錄一  
次得旨依議閩浙二省不必派官前往江甯安徽二處共派一員  
湖南湖北二處共派一員山東河南二處各派一員著大學士九  
卿等於小京堂及科道各部郎中內揀選引見至所議請寬承緝  
盜首之處分一條甚是著照所議行○丙辰 皇貴妃年氏薨輟

朝五日○辛酉諭內閣天津衛設立水師前令戶部兵部工部會議遲延數月迫朕查問始行覆奏明係工部耽誤其逾限之處科道爲何不行查參著大學士等將耽延之故查奏從前朕屢降諭旨期諸臣洗滌怠緩之習訓誡再三仍未悛改殊不能體朕勵精圖治之意凡速議事件與平常事件朕素已定有限期嗣後務遵定限議覆歸結備事件之內有行查他處咨提人犯不能依限歸結者可於限滿之日將情由聲明交送內閣奏聞如並無別項情由而逾限不結科道卽行查參備科道不行查參著內閣都察院一併參奏尋大學士等覆奏遵旨詢問科道等員據供奉旨交議及摺奏事件俱不知會科道衙門無憑稽查嗣後請令於到部之日卽行知會內閣及都察院如限內不能結案將緣由聲明若無緣由逾限不完科道不行查參察出一併議處從之○改直隸原

防滑縣潛縣之把總二兵七十九名歸河南衛輝營參將轄原防  
內黃縣之把總一兵四十一名歸砥州營都司轄○裁直省首領  
佐貳等缺直隸倉大使一江南府照磨四檢校一都司經歷一縣  
丞一巡檢四驛丞四江西布政使司檢校一按察使司照磨一府  
知事三照磨一倉大使一縣丞一巡檢三驛丞十三浙江縣丞一  
巡檢二驛丞一福建府照磨五檢校一稅課大使一湖北府知事  
二照磨一倉大使一州同一湖南巡檢二山東布政使司理問一  
巡檢一河南稅課大使一山西布政使司理問一按察使司知事  
一州同三州判三衛經歷二府司獄四稅課大使二倉大使四縣  
丞十八巡檢一驛丞三改設河曲縣巡檢一陝西稅課大使二舊  
大使一都司一都司經歷一斷事一廣東巡檢一驛丞三河泊所  
官一廣西巡檢二驛丞三雲南通判三州判一鹽課大使一改設



驛鹽道衙門庫大使一雲龍州吏目一○癸亥以何世璠爲貴州

巡撫

由兩淮鹽運使遷

○是月免江南山陽等四縣雲南南甯等四州縣

被災額賦有差

十二月甲子朔以署兵部尙書法海爲左都御史兼管兵部尙書

事○定內閣侍讀學士翰林講讀學士爲從四品翰林侍讀侍講

爲從五品○乙丑解王景灝任調法敏爲四川巡撫以湖廣總督

李成龍兼管湖北巡撫事○直省督撫提鎮等陸續疏參年羹堯

欺罔貪殘大逆不道請亟正典刑下部知之○丁卯宗人府參奏

郡王允禩前膺大將軍任乃違背 聖祖仁皇帝訓示任意妄爲

苦累兵丁侵擾地方軍需帑銀徇情糜費請將允禩革退郡王降

爲鎮國公得旨允禩革去多羅郡王降爲固山貝子○戊辰召朱

作鼎來京以段如惠爲安徽按察使

由河東鹽運使遷

○移直隸保定府

通判駐通州○己巳和碩怡親王等遵旨議覆天津之海口爲京師重鎮滿洲兵丁令往天津駐紮學習水師於海防大有裨益其撥派兵丁二千名之處已經奉有諭旨官兵駐紮地方亦奉旨派出大臣前往相度毋庸再議外此所派兵丁令入旗滿洲蒙古都統等於各該旗餘丁內挑選每滿洲旗分各派二百名設立三佐領蒙古旗分每旗挑選五十名設立一佐領立爲左右兩營兵丁習練火器爲鳥槍手並設副都統一員令其總管滿洲旗分應補佐領防禦驍騎校各三員每翼補協領各二員蒙古旗分應補佐領防禦驍騎校各一員每翼補協領各一員再駐防滿洲兵丁應補理事同知一員筆帖式一員其船隻製造大趕繒船十六隻小趕繒船十六隻酌量分配官兵分爲兩班操演其趕繒船各隨小船一隻應令造杉板船三十二隻雇募駕船頭舵水手令兵丁學

習熟練從之○庚午以阿克敦兼理兵部侍郎

翰林掌院學士

海壽署刑

部侍郎

由給事中署

○癸酉奉安

孝莊文皇后梓宮於

昭西陵○

甲戌議政大臣刑部等衙門題奏年羹堯反逆不道欺罔貪殘罪  
迹昭彰彈章交至案牘等邱山之積罪惡踰谿壑之深臣等謹將  
其罪案列款陳之其大逆之罪五一年羹堯與靜一道人郝魯等  
謀爲不軌一將 殊批諭旨輒敢做寫進呈一見汪景祺西征隨  
筆不行參奏一家藏索子甲又私行多貯鉛子皆軍需藥物一僞  
造圖讖妖言其欺罔之罪九一邵陽用兵致死無辜良民八百餘  
口奉旨查問始奉並未傷損一人後又止奏出六人一縱容私人  
邊鴻烈等恣行騷擾激變番民不卽參奏一捏奏都統武格等鎮  
海堡失律一西安起身私屬咸甯令朱炯買人保留一通同趙士  
河作弊將劉以堂假冒趙勳名字赴武功縣任巧飾具奏一將幕

賈張泰基父子趙士河之弟趙祺及伊兄年法堯並高之傅等共十八案冒入軍功一家人魏之耀家產數十萬金年羹堯妄奏毫無受賄一西甯效力者實止六十二員冊報一百九員一將退役王治奇名字冒入軍功令人頂替選授廣德州州判其僭越之罪十六一出門黃土填道官員穿補服淨街一驗看武官用綠頭牌引見一會府龍牌前設床正坐一用鷲黃小刀荷包擅穿四衩衣服一衣服俱用黃包袱一官員餽送俱云恭進一伊子穿四圍補服一凡與屬員物件令北向叩頭謝恩一總督李維鈞巡撫范時捷跪道迎接受之不辭一令扎薩克郡王額駙阿寶下跪一行文督撫書官書名一進京陛見沿途墊道疊橋鋪面俱令關閉一坐落公館牆壁俱彩畫四爪龍一轅門鼓廳畫四爪龍吹手穿段蟒袍一私造大將軍令箭又將頒發大將軍令箭燒毀一賞賜

動至千萬提督叩頭謝恩其狂悖之罪十三一兩次恩詔到陝並不宣讀亦不張挂一奏摺在內房啓發並不穿朝服大堂拜送一同城巡撫不許放礮一勒娶蒙古貝勒七信之女爲妾一以侍衛擺對前引後隨又令墜燈一大將軍印不肯交出一妄稱大將軍所行之事俱循照俗例而行一縱容家人魏之耀等穿朝服補服與司道提鎮同坐一在儀徵地方違旨逗遛一勒令川北總兵王永吉告老一與行止妄亂之沈竹戴鐸結黨懷欺煽惑眾聽一袒庇私人馬德仁阻回石文焯參本一將本內朝乾夕惕故寫夕惕朝乾其專擅之罪六一邵陽縣建築城堡不行題請擅發銀兩一將侍衛李俊等題請委署守備奉旨不准題補又不卽行調回一擅用私票一萬二千張作引十二萬道行鹽一奉旨停捐雍正二年俸工仍令照舊公捐一拏獲私鹽李乾勝擅令銷案一面屬

董玉祥將患病守備何天寵不令照例填注軍政屬李維鈞勒令陸篆接受王允猷虧空其貪贖之罪十八一題補官員受謝儀四十餘萬兩一勒索捐納人員額外銀二十四萬兩一受趙之垣金珠等物值銀二十萬兩一取受樂戶賣經榮銀兩一受宋師曾銀一萬兩並玉杯等物一徧置私人私行鹽茶一私占咸甯等十八處鹽窩一收受葛繼孔餽送古玩一受傅澤灃賄明知虧空不行查參一勒令四省效力人員每員幫銀四千兩一受參革知府樂廷芳賄豫帶往陝省一將搶掠各番衣服等物掩爲己有一私徵新撫各番雍正二年租糧一蒲州盤獲私鹽計值一萬兩入己一差家人高四販買馬匹一令家人顏泰將馬匹發興安各鎮勒取重價一委典史朱尙文販買木植一令馬起龍賣茶得銀九萬九千餘兩其侵蝕之罪十五一冒銷四川軍需一百六十餘萬兩又

加派銀五十六萬兩一冒銷西甯軍需四十七萬兩一運米四萬石至軍前冒銷腳價四十餘萬一侵用康熙六十年起至雍正三年俸工銀十四萬九千餘兩一借名築布隆吉爾城垣冒銷錢糧一隱匿夔關歷年稅銀八萬八千兩又加派軍需糧規五萬餘兩一將拏獲私茶罰贖銀四萬餘兩入己一侵用河東鹽政盈餘捐修銀五萬六千餘兩一將見貯西安未運米一萬石捏稱運至西甯冒銷腳價四萬六千餘兩一將甯夏各衛所貯倉耗一萬四千石並不題報並畱甯拴養馬匹工料銀一萬五千兩入己一侵用城工餘贖銀一萬六千餘兩一買貯咸長等八縣米浮銷價銀一萬五千餘兩一鈔沒塔兒寺礮砂茜草等物私自變價一萬四千餘兩一侵紀廷詔等捐解銀一萬兩一砍取桌子山木植借稱公用存貯入己其忌刻之罪六一見任職員陵虐遺調任用私人奪

缺委署一軍前官兵支給口糧不先咨明晉撫欲致其遲誤獲罪  
一將綽齊會商軍餉清字咨文差趙成說非交代事件欲致岳  
鍾琪遲誤軍需一捏參程如絲販賣私鹽殺傷多人一欲薦李維  
鈞爲巡撫設計誘陷趙之垣一遏抑阿炳安等軍功共六案其殘  
忍之罪四一出示訪拏曹猪頭該縣將馮猪頭錯解並不覆審卽  
行枉殺一無故將筆帖式戴蘇鎗拏監禁一急欲出缺劾參金南  
瑛等七員庸劣病廢一將白吉濟克濟扎卜等不善於安輯致伊  
等困苦失所以上各款供狀昭著謹按律內凡謀反不分已未行  
皆凌遲處死又大不敬者斬詐傳詔旨者斬大逆知情故縱隱藏  
者斬官員交結紊亂朝政者斬妻子爲奴財產入官官吏人等挾  
詐欺公妄生異議擅爲更改變亂成法者斬造讖緯妖書妖言者  
斬假與人官者斬偽造茶鹽引者斬在外大小各衙門官但有入



遞進呈寶封公文至御前而上司官令人於中途邀截取回者斬  
侵盜錢糧入己數滿三百兩者斬有一於此法所不宥而年羹堯  
所犯至九十二大罪內外文武諸臣合口齊聲恥同覆載伏請

皇上將年羹堯立正典刑以申國法其父及兄弟子孫伯叔伯叔  
父兄弟之子年十六歲以上者俱按律斬十五歲以下及母女妻  
妾姊妹及子之妻妾給付功臣之家爲奴正犯財產入官仍將臣  
等審訊年羹堯惡蹟昭示中外以爲天下萬世人臣反逆不道欺  
罔貪殘者戒得旨年羹堯不臣之心顯然但因喪心病狂昏憤顛  
倒之所致鄒魯乃無知小人相與謀逆之情雖實而事蹟尙未昭  
著朕念年羹堯青海之功不忍卽加極刑著交步軍統領阿齊圖  
令其自裁年羹堯剛愎殘忍之性朕所夙知其父兄之教不但素  
不聽從而向來視其父兄有如草芥年遐齡年希堯皆屬忠厚安

分之人著革職寬免其罪一應賞賚御筆衣服等物俱著收回年  
羹堯之子甚多惟年富居心行事與年羹堯相類著立斬其餘十  
五歲以上之子著發遣廣西雲貴極邊烟瘴之地充軍年羹堯之  
妻係宗室之女著遣還母家去年羹堯及其子所有家貲俱鈔沒  
入官其見銀百十萬兩著發往西安交與岳鍾琪圖理琛以補年  
羹堯川陝各項侵欺案件其父兄族人皆免其鈔沒年羹堯族中  
有見任候補文武官者俱著革職年羹堯嫡親子孫將來長至十  
五歲者皆陸續照例發遣永不赦回亦不許爲官有匿養年羹堯  
之子孫者以黨附叛逆例治罪著內閣明白記載鄒魯著改爲立  
斬其親弟兄子姪著僉妻發往黑龍江給與披甲之人爲奴其餘  
皆從寬免○領侍衛內大臣公馬爾賽步軍統領阿齊圖恭捧諭  
旨諭年羹堯爾亦係讀書之人歷觀史書所載曾有悖逆不法如

爾之甚者乎自古不法之臣有之然當未曾敗露之先尙皆假飾  
勉強偽守臣節如爾公行不法全無忌憚古來曾有其人乎朕待  
爾之恩如天高地厚且待爾父兄及爾子並爾闔家之恩俱不啻  
天高地厚爾捫心自思朕之恩尙忍負乎授爾爲川陝總督又用  
爲撫遠大將軍將西陲之事全畀於爾事專推心置腹文官自督  
撫以至州縣武官自提鎮以至千把俱聽爾之分別用舍朕意以  
爾實心爲國斷不欺罔故盡去嫌疑一心任用爾乃作威作福植  
黨營私如此孤恩負德於心忍爲乎卽如青海之事朕命爾四月  
閒進兵爾故意遲延又命於八月進兵爾復稽留不往及朕嚴加  
催督然後進兵孤軍冒險幾至失機又如阿喇衲所領之兵爾令  
其由噶斯地方前進以險惡不可行之路令其行走豈非欲陷害  
阿喇衲乎又如爾令富甯安將橐駝三千餘隻從巴爾庫爾送至

布隆吉爾爲無用之需豈非設計欲陷害富甯安乎又如令岳鍾琪之兵調至西甯其經由之路爾指令舍近就遠故意使其紆道數千里欲使蔡珽運糧不及豈非欲巧陷蔡珽乎此皆國家軍務大事視爲兒戲藉此以快私忿尙得謂之有人心者乎又如爾所奏善後十三條於不應造城之處建議造城於不應屯兵之處建議屯兵並無一件有益於事爲國家籌畫邊機如此草率錯亂是誠何心如青海用兵以來爾之殘殺無辜顛倒軍政等事朕尙皆未令入於廷臣議罪之條卽就廷臣所議九十二條之內爾應服極刑及立斬者共三十餘條朕覽之不禁墮淚朕統御萬方必賞罰公明方足以治天下若如爾之悖逆不臣至此而朕枉法寬宥則何以彰國家之憲典服天下之心乎卽爾苟活人世自思負恩悖逆至此尙可以對天地鬼神靦顏與世人相見乎今寬爾殊

死之罪令爾自裁又赦爾父兄子孫伯叔等多人之死罪此皆朕委曲矜全莫大之恩爾非草木雖死亦當感涕也○乙亥追贈

皇貴妃年氏爲敦肅皇貴妃○丙子諭大學士等康熙六十年年

羹堯奏請四川復設鋪司經部議准設立每年支給工食銀三萬

六千餘兩及朕訪聞四川並未設立鋪司仍令塘兵傳遞文書將

鋪司工食銀俱乾沒入己此係高其佩四川按察司任內經手之

事爾等可卽詢問高其佩令其據實一一陳奏不准絲毫隱瞞若

高其佩稍有徇隱將來法敏程如絲查出回奏到日定將高其佩

從重議處○丁丑調傅爾爲盛京戶部侍郎

由戶部右侍郎調

○戊寅移

四川松茂道駐茂州○庚辰諭吏部教官專司課士前恐捐納出

身之員文藝未能精通難以訓課士子故令改補佐貳等官朕思

此等改補之員並非事故出身之比其從前教職任內所歷之俸

自應准其一併通算不得將前俸開除且此等改補人員甚多其中豈無辦事可用之材爾部可將見在赴部改補人員內識字能書履歷者傳齊帶領來引見此係朕愛惜人才至意惟恐或有遺棄特降諭旨其優劣俱係朕親定若伊等以不肖之心自待妄行請託爲人所愚不但負朕深恩自壞人品日後發覺且罹罪戾爾部並傳諭知之○辛巳刑部等衙門議奏妄作西征隨筆之汪景祺照大不敬律擬斬立決得旨汪景祺作詩譏訕 聖祖仁皇帝大逆不道應當處以極刑今大臣等定擬立斬具奏姑從其請著將汪景祺立斬梟示其妻子發遣黑龍江給與窮披甲之人爲奴其期服之親兄弟親姪俱著革職發遣甯古塔其五服以內之族人見任及候選候補者俱著查出一一革職令伊本籍地方官約束不許出境○免江南太平盱眙泗州三州縣本年分旱災額賦

有差○壬午諭巡視五城御史今年天氣寒冷聞外間無屋居住之窮民竟有受凍傷損者朕心深爲憫惻朕思居民中豈無愷悌好善之人但因慮及稽查牽累不敢輕易收留此亦人情之常爾等可留心照看使寒夜不致露處若有好義之人容其棲息者不必禁阻至明春二月和暖便可無慮爾等巡城之職固在禁民爲非亦當恤窮救困嗣後儻有凍斃之人經朕訪聞爾等不得辭其責也又諭今年天氣甚冷京城多有窮民廣甯門安定門外向有養濟院此二處著將變色米賞給一百石煮粥賑濟傳諭倉場侍郎將米樣呈驗然後賞給○癸未署浙江巡撫福敏疏紹興海塘工程原議皆用條石後以條石不易購致限期已迫遂用條石托外亂石填中今恐日久坍塌仍改用條石請寬限期督率改築得旨海塘工程關係民生最爲緊要必須一勞永逸若因條石一時

難以購致從前便當聲明緣由奏請展限何得草率從事著交與  
新任巡撫李衛悉心查勘指示更改修理務期永遠堅固張楷在  
江南修理塘工用木椿密釘似爲有益可否做行並令李衛酌量  
○改管理天津水師營副都統爲都統○甲申調史貽直爲工部  
右侍郎以張令璜爲吏部左侍郎由大理寺選○景日昫乞假回籍以  
魏方泰爲禮部右侍郎由詹事選○以莽鶴立爲兵部右侍郎由大理寺卿選  
明圖爲內閣學士由額外侍讀學士選○宗人府參奏廉親王允禩因護軍  
九十六不遵伊之指使立斃杖下太監閻進代伊隱瞞所行之事  
重賜銀兩衣服允禩擅專生殺之權甚爲悖亂應將允禩革去親  
王嚴行禁錮將所屬佐領撤入公中得旨允禩革去親王禁錮並  
撤所屬佐領之處俱著寬免九十六之宗族佐領不可畱於允禩  
屬下著撤入公中○乙酉諭兵部朕君臨萬方中外一體有功必



實有罪必懲初無偏黨之心亦並不存依違之見前以羅布藏丹  
津潛行悖逆謀擾邊陲朕命將出師用彰天討滿洲綠旗漢土官  
兵皆能奮勇爭先克成懋績論功行賞恩所宜施乃年羹堯以私  
昵人員冒濫入冊以致綠旗官兵議敘至今駁查未定而土司功  
冊亦因之暫停朕心深爲惻念夫土司非比內地凡所遣調目兵  
皆豫定名數按名隨師無從虛冒其功績等第必定詳確稽查如  
四川屬之瓦斯雜谷二土司部下目兵與三寨包坐之頭目所部  
番兵皆屢年效力戰功尤多小金川土司湯鵬陝西土司魯華齡  
於攻取臬子山時其目兵亦能勦力用命似此邊遠番眾知效忠  
誠則其寸功必宜盡錄爾部查照領兵官所報各土司功冊除各  
土兵已給賞賜外其官目應各加以職銜仍予恩賞陣亡帶傷者  
照依綠旗兵丁一體優恤務期均霑實惠仍將此旨下與該管督

撫提鎮轉飭各土司自茲以往尤宜益矢忠勤各兵駐牧嚴束部  
落不得滋事生非和睦族鄰不可恣行讎殺盡地莫非王土率土  
莫非王臣番苗種類固多皆係朕之赤子或有强悍不平各土司  
祇宜赴該管上司陳告豈得任意戕殺以背朕好生保赤之念各  
土司果能慄遵訓誡則世守職土朕自加恩若敢恃功驕肆陽奉  
陰違則國法具在亦斷不因今日之功賞更從寬貸也○丙戌牛  
鈕緣事降調以阿克敦爲禮部左侍郎由翰林掌院學士遷○怡親王等陳  
奏直隸水利營田事宜三款一白衛淀地等河情形並繪圖進呈  
一請於灤薊等處各設營田一請揀選河員得旨直隸地方向來  
旱澇無備皆因水患未除水利未興所致朕宵旰軫念莫釋於懷  
特命怡親王及大學士朱軾前往查勘今據查繪圖陳奏所議甚  
爲明晰且於一月之內衝寒往返而能歷勘周詳區畫悉當以從

來未有之工程照此措置似乎可收實效具見爲國計民生盡心經畫甚爲可嘉著九卿速議具奏至於工程應用人員若交與九卿揀選恐有掣肘卽令怡親王及朱軾揀選請旨其從前差往修城修隄之員俱著於水利工程處一同辦理○丁亥命直隸被水州縣加賑一月○戊子諭大學士等積貯倉穀關係民生最爲緊要朕屢降諭旨令該督撫嚴飭州縣及時買補昔年虧空之數無如苟且遲延奉行不力卽如原任直隸總督李維鈞曾奏稱各屬倉穀已補足七八分及今冬發倉賑濟虧空甚多若非截留漕米並發給通倉之米窮民幾至失所矣昨據月選官陳克復條奏虧空倉穀請動支正項買補一面嚴追本官還項朕已交與九卿議行今直省地方俱著定限三年將一應倉穀務期買補完足不得顆粒虧欠三年之後朕必特差官前往盤查如有缺項定行重治

其罪儻有不能補足情由著該督撫題奏凡虧空錢糧猶可勒限  
追完無損國帑若虧空倉穀則一時旱澇事關民瘼是虧空倉穀  
之罪較虧空錢糧爲甚自宜嚴加處分並著內閣九卿確議定例  
具奏○諭內閣山東歷城等四十三州縣德州等五衛所今歲被  
水收成歉薄巡撫陳世倌奏請將被災之州縣衛所應徵漕糧盡  
行紓徵分作三年帶徵起運經部議覆以漕糧無本年全緩分作  
三年帶徵之例應緩徵一半於雍正四年秋成後徵收起運等語  
朕思被災地方有輕重不等若被災既重卽徵收漕米一半閭閻  
亦覺艱難著山東巡撫於四十三州縣五縣所之中悉心詳查其  
被災稍輕之處仍照部議緩徵一半被災重者准其全緩務期分  
別確當不得草率偏枯備輕重失實日後發覺定行重治其罪○  
以左僉都御史王廷揚安徽按察使段如惠經理直隸水利事務

○以祖秉圭爲安徽按察使

由湖南辰沅靖道遷

○寶授許容陝西按察使

仍兼管西安糧驛道事

○己丑諭陝西總督巡撫等

西安地方緊

要又有滿洲駐防兵丁省倉米石應當多貯查西安見在所貯米

石爲數無多今歲秦省收成豐稔著總督岳鍾琪巡撫圖理琛就

近商酌動用庫銀採買米石存貯省倉以爲備用其米數多寡該

督撫酌定奏聞務須陸續採買勿令價值騰貴儻倉廩不足亦令

該督撫酌議收貯之法該督撫等宜仰體朕心實力奉行○以原

任河道總督靳輔治河著續其子副參領治豫明晰河務加工部

侍郎銜協理江南河工事務○庚寅禮部等衙門遵旨議覆先

師孔子聖諱理應回避惟祭天於圓丘丘字不用回避外凡係

姓氏俱加偏旁爲邱字如係地名則更易他名至於書寫常用之

際則從古體丘字得旨今文出於古文若改用丘字是仍未嘗回

避也此字本有期音查毛詩及古文作期音者甚多嗣後除四書五經外凡遇此字並用邱字地名亦不必改易但加偏旁讀作期音庶乎允協足副朕尊崇先師至聖之意○諭刑部從前內外惡亂鑽營之人紊亂法紀朕知之甚悉是以登極以來不時教訓宮內太監並外廷大臣等凡事無得欺隱有鑽營者斷不寬恕若被拏獲務必從重懲戒正法屢次諭旨甚明乃有婦院太監傅國相向奏事太監劉裕探聽外邊有一廢官欲圖開復曾否保奏一事劉裕止告訴總管太監俱不奏聞甚屬可惡著將總管太監並奏事太監劉裕問明情由凡有關涉此案人犯俱行鎖拏查問治罪○以沈廷正爲河南按察使由開歸道進○辛卯 上以 聖祖仁皇帝東西煖閣御用絨氍宣示廷臣諸王大臣等奏言 聖祖仁皇帝臨御六十餘年時時以愛惜物力崇尚儉素爲休養元元之

本而 聖躬服御之物尤倍加撙節質樸無華歷久不易今臣等  
恭覽 御前陳設之瓊歷三十餘年尙潔淨完整崇儉惜物實從  
古未有請宣付史館以昭 聖德得旨是○戶部等衙門遵旨議  
准直隸河防水利事宜據和碩怡親王等疏言直隸之衛河淀河  
子牙河永定河皆匯於天津州大直沽入海此直隸水道之大路  
也衛河與汶河合流東下德棣倉景以下春多淺阻一遇伏秋暴  
漲不免潰溢請將滄州南之磚河青縣南之興濟河故道疏濬於  
舊時建閘之處築減水壩以洩衛河之漲靜海縣權家口亦築壩  
減水白塘口入海之處並開直河一道使磚河興濟河之委同歸  
白塘出口修理海口舊閘以時啓閉則滄瀛以北水利興而水患  
除矣東西二淀跨雄霸等十餘州縣均應疏濬深廣並多開引河  
使諸淀脈絡相通其已淤爲田畝者四面開渠中穿溝洫庶圩田

旱澇有備其趙北苑家二口爲東西二淀咽喉趙北口隄長七里  
板石橋共八座俱應升高加闊苑家口北之中亭河上流之玉帶  
河對岸爲十望河均應開通庶東西二淀無衝決之患矣子牙河  
爲滹漳下流清濁二漳發源山西經廣平正定而滹沱滏陽大陸  
之水會焉其下流有清河夾河月河皆分子牙之流同趨於淀宜  
開決分注以緩子牙河奔放之勢永定河俗名渾河水濁泥多故  
道遂湮應自柳叉口引之稍北繞王慶沱之東北入淀兩河淀內  
之隄至三角淀而止爲眾淀之歸宿應照舊開通逐年疏濬兩河  
之濁流自不能爲患矣至各處隄防衝潰甚多如高陽河之紫淀  
口新河南界之古隄新安之霍河均應疏濬修築再請於京東之  
樂薊天津京南之文霸任邱新雄等處各設營田專官經畫疆理  
召募老農課導耕種民力不辦者動支正項錢糧代爲經理田熟



歲收十分之一以補庫帑足額而止營田一頃以上者分別獎賞  
有能出貨代營者民則優旌官則議敘至各屬官田約數萬頃請  
遣官首先舉行爲農倡率民間田廬有礙水道者計畝撥抵視其  
畝數加十之二三河淀淤地必須挖掘者將附近官地照數撥補  
則營田水利人皆趨事樂從矣從之○是月免河南西華等四縣  
雲南鄧川等二州江南太平等三州縣被災額賦有差○是歲琉  
球國西洋來貢